

S'isch Fyyr im Dach!



grindet 1975

Fasnacht 2007




S Baudep macht scho länger Furore
Drum duets in dr Stadt au rächt rumoore
Zum Nutze vo neije Weermequelle
Hänn si s Rad neij erfinde welle
Si sinn go boore ganz wyt unde
Z underscht in de diefe Schrunde
Hänn Wasser dryypumpt – nit vyyl dänggt
Und nyt an die grossi Glogge ghänggt
Die ganzi Stadt hetts duregrittlet
D Bevelggerig rächt ummegschittlet
Jetzt breesmelets im Fundamänt
Und au im Baudepartemänt

*Hösch Basel, schloofsch? Wird ändlig wach!
Merggsch es nit, s'isch Fyyr im Dach!*



Unsri Regierig hett Visioone
Mänggmool au numme Ilusioone
Was die so plaane, isch doch gsteert
Mir Basler wärde nimme gheert
Vrbyy isch s mit de Tradizioone
Wäge deene Kommissioone
Wo soll denn au dr Zirkus aane
Wo d Mäss mit Buude und de Bahne
Uff em Mässplatz wird scho wider baut
Dr ganz Platz wird – exgyysi – versaut
Und d'Rosetalanlaag so scheen und alt
Deert aane kunnt – miesch loose – e Wald!

*Hösch Basel, schloofsch? Wird ändlig wach!
Merggsch es nit, s'isch Fyyr im Dach!*



Im Haafe deert im Santi Hans
Bittet d Chemyy zem Campus-Danz
Stararchideggte sinn engaschiert
do aane koo, hänn Hyyer kriert
Keins gseht us wie s andere
Das gsehsch bim nääbedurewandere
Am obere Dail vo unserm Rhyy
Deert stoht jo au e Stigg Chemyy
S'isch klar – die leen sich nit lang bitte
S git schyynts no anderi Staare hitte
Dr Mässturm als Wohrzaiche – dasch vrbyy
Dää Spiraale-Turm muess heecher syy


*Hösch Basel, schloofsch? Wird ändlig wach!
Merggsch es nit, s'isch Fyyr im Dach!*







Es graiselet in uns'rem Basel
Laidr isch das gar kai Gfaasel
E Graisel doo – e Graisel deert
Z'ringelum – das isch doch gsteert
Verkehrsberuhigend sott das syy
Fallt deene denn gar nyt anders yy?
Mir wärde doch numme schikaniert
An dr Naase ummegfiehrt
Loset, Barbara und Fritz
Langsam isch das nimm e Witz
Heeret uff – dient uns nimm quääle
Ihr händd doch dr Kopf nit numme zem strähle.

*Hösch Basel, schloofsch? Wird ändlig wach!
Merggsch es nit, s'isch Fyrr im Dach!*



Oh FCB – oh FCB
Wie duet uns unser Härz so weh
Kei Cup- und au kai Maischterfyrr
S wär so scheen uff däm Papyrr
E Bild vom Casino mit rot-blaue Fahne
Und luegt me denn no ganz gnau aane
wär z mitts drinn inne – uff das schwör i
Die glaini blondi Gigi Oeri
Doch – wie gsait – s hett nit solle syy
Drum leen mir au das Bild do syy
Und mit dämm grosse lääre Flägg
Isch s Casino samt em FCB ewägg

*Hösch Basel, schloofsch? Wird ändlig wach!
Merggsch es nit, s'isch Fyrr im Dach!*



Jeede glaine griene Flägg
S'isch bekannt – däa muess ewägg
Im Landhof solle Hyysen aane
S wohnt kaine deert – wo so duet plaane
D Erlematt – mir hänn s miesse bschliesse
Duet als nei Quartier us em Boode schiesse
S git Schuele, Lääde und villicht gar am Änd
Dr nei Sitz vom Baudepartemänt
Denn isch no d'Stüggi zum verplaane
Dert soll e likaufszentrum aane
Und d Märthalle – mir kenne s nit verstoh
Wird doch tatsächlich de Zircher iberloo

*Hösch Basel, schloofsch? Wird ändlig wach!
Merggsch es nit, s'isch Fyrr im Dach!*



Do jaggts aim doch dr Nuggi uuse
Und langsam kunnt eim s grosse Gruuse
Wottsch Wällebyyge uff dr Gass
Keisch uff d'Schnuure – s'stinggt, s'isch nass
E jeede schifft an jeedi Wand
Mänggmool au grad Hand in Hand
Schnuder, Kooder, Kotzede
S git glyy e langi Zotzlede
Iber was me alles brichte kennt
Wie s im Glaibasel scho so lang brennt
Drzue dööneret's no an jeedem Egge
Muess me euch denn wirgglig wegge?

*Hösch Basel, schloofsch? Wird ändlig wach!
Merggsch es nit, s'isch Fyrr im Dach!*

